



Jau discurs rumantsch!

Vulais Vos mussar che Vos avais emprendì rumantsch?

A partir dal 2021 pudais Vos laschar examinar Vossas enconuschientschas da rumantsch. I dat examens en ils idioms sursilvan, sutsilvan, surmiran, puter e vallader – ed en rumantsch grischun.

Tge nivels datti?

I dat examens a bucca sin ils nivels A2 e B1 ed examens en scrit sin ils nivels A1 ed A2. Ins po absolver differents nivels a bucca ed en scrit. Sch'ina persuna discurra per exempel gia currentamain rumantsch, na sa però betg leger u scriver uschè bain, pudess ella s'annunziar per l'examen a bucca sin il nivel B1 e per l'examen en scrit sin il nivel A1 ubain A2.

A tgi sa drizza l'examen?

L'examen sa drizza a tut las persunas interessadas che han emprendì rumantsch, in idiom u rumantsch grischun, en in curs u en il mintgadi, e che vulessan laschar examinar lur enconuschientschas linguisticas.

L'examen è era reconuschì per las proceduras uffizialas en connex cun la naturalisaziun, la permissiun da dimora u la permissiun da domicil:

- Sch'ina persuna vuless absolver l'examen per la naturalisaziun, sto ella far ils examens per ils nivels B1 a bucca ed A2 en scrit.
- Per la permissiun da domicil (C) dovri ils nivels A2 a bucca ed A1 en scrit.
- Per la permissiun da dimora (B) dovri il nivel A1 a bucca.

Co è l'examen structurà?

Vus manais l'emprim in discurs cun duas expertas. Il discurs dura 10-15 minutas. Silsuenter faschais Vos duas incumbensas en scrit. I sa tracta d'incumbensas dal mintgadi; Vos na stuais betg As preparar spezialmain per quellas. En tut va l'examen circa in'ura.

Datti in certificat?

Sche Vos dumagnais l'examen cun success, survegnis Vos in **passaport da las linguas**. Il passaport da las linguas vegn emess per incumbensa dal Secretariat da stadi per la migraziun SEM ed è reconuschì sco cumprova linguistica en proceduras per survegnir la permissiun da domicil, da dimora ed il dretg da burgais.

Cura e nua pon ins absolver ils examens?

Ils examens han lieu duas giadas ad onn a Cuira. Las datas d'examen vegnan publitgadas sin la pagina-web da fide e sin www.curs.ch.

Vus pudais telechargiar il formular d'annunzia da las paginas-web u empustar il formular via e-mail: rumantsch@fide-info.ch. Sche Vos duvrais ulteriuras infurmaziuns, ans tramettai p.pl. in e-mail a questa adressa e nus respundain a Vossas dumondas en scrit u per telefon.

fide 
rumantsch

Examen da rumantsch

(rumantsch grischun)

Secretariat fide
Haslerstrasse 21
3008 Berna
031 351 12 12
rumantsch@fide-info.ch
www.fide-info.ch

Lia Rumantscha
Via da la Plessur 47
7000 Cuira
081 258 32 22
curs@rumantsch.ch
www.curs.ch